

ANA EUANGKERIO IESU KRISTO





TERA ANA EUANGKERIO IESU KRISTO

Ana euangkerio Iesu Kristo bon ana babaire Tamara are i Karawa ibukin kukureia ao **kamaiuakiia*** natina. E aranaki bwa ana euangkerio Iesu Kristo ibukina bwa te babaire aei e boboto iaon ana **Mwakuri ni Kamaiu** Iesu Kristo. N aron Ana babaire, Tamara are i Karawa E kanakoa Natina te Mwaane, Iesu Kristo, nakon te aonaaba bwa E na kaota nakoira aron maiu aika uaana ma ni kakukurei ao ni karekea ataakin te kimwareirei ae akea tokina n te maiu ae na roko. Rinanon Ana **akoi** ao Ana nanoanga Iesu Kristo, ko kona ni kaitiakaki man te bure ao ni kimwareirei n raun am iango. Ko kona n tau ni maeka ma Tamara are i Karawa n te maiu ae na roko.

Ni karekea te rau ao te korakora aio, ko riai n reiakina ao n iri moan tuua ao taian **otenanti** n te euangkerio. Te moan tua bon te koaua ae ko kona ni kamanena ni maium; te otenanti bon te bwai ae tabu, te mwakuri ae baireaki ae karaoaki man te kariaiakaki n te nakoanibonga ao n anguin te tai te kawai ni karaoa te **berita** ma Tamara are i Karawa. Moan tuua n te euangkerio bon te onimaki iroun Iesu Kristo ao te rairannano. Moan otenanti n te euangkerio bon te **bwabetito** ao karekean te Tamnei ae Raoiroi.

Imwiin reiakinan ao iriiran moan tuua ao taian otenanti n te euangkerio, ukora irakin ana banna ni katooto Kristo inanon nikiran maium. Te kakaonimaki ae e reitinako aei e aranaki bwa “te teimatoa ni karokoa te toki.”

*Ko kona ni maiuakina
ana euangkerio Iesu
Kristo ngkana ko:*

- *Karikirakea te onimaki
iroun Iesu Kristo.*
- *Rairannano.*
- *Te bwabetitoaki ao buti-
mwaean te Tamnei ae
Raoiroi.*
- *Te teimatoa ni uaa te
toki.*

*Taeka akana a kaurauraaki a kabwarabwaraaki n te iteraniba 18 ao 19.

TE ONIMAKI IROUNIESU KRISTO

Te onimaki bon te koaua ae korakora are kamwakura te aomata ni karaoa te mwakuri. Te onimaki ae kairiira nakon kabwaraan buure e boboto iroun Iesu Kristo, are Ana Mwakuri ni Kamaiu e karekea te kona ni kabwarai bure. Onimakinan Iesu Kristo e raka riki nakon onimakinana n akea te kakamwakuri. Nanona

*“Onimakina te Uea ma nanom ni kabanea; ao tai mwiokoa oin am ataibwai.
“Kaotia n am waaki ni kabane, ao E na kaira kawaim.”*

Taeka n Rabakau 3:5–6

kakoauaana bwa bon Natin te Atua te Mwaane ao E maraki ibukin ami bure, karawawatami, ao mamarami. E nanonaki te mwakuri iaon te koaua arei. Te Onimaki iroun Iesu Kristo e kairiko nakon tangirana, onimakinana, ao kawakinan tuua.

TE RAIRANNANO

Te Onimaki iroun Iesu Kristo e na kairiko bwa ko na kan bita maium nakon ae raoiroi riki. Ngkana ko kamatebwaia te euangkerio, ko na ataia ae ko a tia ni bure, ke ni kaitaraa Ana reirei te Atua. N rinanon te rairannano, ko biti iango akekei, nanom, anuam, ao mwakuri ake a aki boraoi ma Ana reirei te Atua. E berita bwa ngkana ko rairananom, E na kabwarai am bure. Ngkana ko rairananom ko:

Ataia ae koa tia ni bure ao n namakinna ma nanom ni koaua te nanokawaki ibukin te bwai are ko a tia ni karaoia.

Katoka karaoan te bwai ae bure, ao keiakina n aki manga karaoia.

Kaoti am bure nakon te Uea ao bubuti kabwaraan am bure. Karaoan aei e na kabebetea te uota ae rawawata. Ngkana ko a tia ni bure nakon temanna, ko butia naba te aomata anne kabwaraan am bure.





Karaoa te kabomwi. Ko na kabanea am kona ni kaeti kanganga are a reke man am mwakuri.

Kawakin tuua. Te ongeaaba nakon ana tua te Atua e uota mwaakan te euangkerio nako nanon maium. Te euangkerio e na anganiko te korakora ni kitani ami bure. Kawakinan tuua e kaairaki ma karaoan te mwakuri ni ibuobuoki, kabwaraan aia bure tabeman, ao irakin taian bootaki n te Ekaretia.

Kakoaua te Tia Kamaiu. Iteran te rairannano ae moan te kakawaki bon ataa kina bwa te kabwarabure e reke ibukin Iesu Kristo. N tabetai ko a tia n namakinna bwa te Atua e na aki kabwarai bure aika rawawata. Ma te Tia Kamaiu e maraki ibukin ara bure bwa ti aonga n tokanikai iaoia, ai uana naba ma ake a rawawata. Mwiin te rairannano ni koaua bon kabwaraan buure, te rau, te mweraoi, ao te kimwareirei.

Te rairannano e aki nanonaki n taai nako bwa karaoan bitaki aika bubura. Angiin te tai e ti kainnanoa kamwaitan te anganano ni maiuakina nanon te Atua. Te rairannano ni koaua e aki waekoa n reke; bwaina te taotaona n nano i bon iroum ngkai ko keiaki ni karaoa te eti ao ni kaeti kairua ake ko karaoi. Ngkana ko raira nanom, ko na namakina bitakin nanom. Ko na bon aki manga tangiria ni bure. Ko na ataia bwa ngkoe natin te Atua ao bwa ko na aki kainnanoa reitan nako n okiokiran karaoan kairua naba akekei. Nanom n tangiria n ira te Atua e na rikirake ni korakora ao n nano riki.

Ti bane ni kakairua.

N tabetai ti bon reke n te kangaanga ao ti karekei kangaanga aika kakaiaki na-koia tabeman n aanga are ti aki kona ni karaoa mwii- na n tii ngaira. Ti urui bwaai aika ti aki kona ni karaoa uruakina n tii ngai- ra. I mwiina ti raraoma, ti maama, ao te karawa- wataaki, ae ti aki kona ni katokia n tii ngaira. Mwaakan te Mwakuri ni Kamaiu e kona ni katoka te bwai are ti aki kona ni manga karaoia.

TE BWABETITO AO TE TAMNEI AE RAOIROI

Te onimaki iroun Iesu Kristo ao te rairannano e katauraoiko ibukin te bwabetito ao ni butimwaea te Tamnei ae Raoiroi. Iesu Kristo e reirei bwa aomata ni kabane a riai ni bwabetitoaki n te ran ao te Tamnei (te Tamnei ae Raoiroi) ibukin kamaunaan, ke kabwaraan, buure. Rinanon te bwabetito iroun temanna ae iai irouna te kariaiakaki n te nakoanibonga ao rinanon karekean te Tamnei ae Raoiroi, ko na bon manga bungiaki n te tamnei.

E aera Ngkai I Kainanoa Bwabetitoaki?

Iesu Kristo e anga te banna ni katooto ibukira ngke e bwabetitoaki ni “kakoroa nanon te kororaoi ni kabane” (Mataio 3:15). Ngkana ko bwabetitoaki, ko karekeea kamaunaan am bure (tara Mwakuri 2:38). Ko karaoa am berita, ke ko berita, ma te Atua:

“E kaeka Iesu, E boni koaua ae I tuangko, bwa ngkana e aki bungiaki te aomata n te ran ao te Tamnei, ao e aki kona n rin n abanuean te Atua.”

Ioane 3:5

ko berita bwa ko na butimwaea Iesu Kristo bwa am Tia Kamaiu, n iriria, ao ni kawakin Ana tua. Ngkana ko karaoa am itera, Tamam are i Karawa e berita bwa e na kabwarai am bure. Ngke ko bwabetitoaki irouia uake iai irouia te kariaiakaki, am bure a na bane ni kaitiakaki.

Te bwabetito e irekereke ma te kateboaki inanon te ran n te tai ae uarereke.

Aio aron bwabetitoan Iesu Kristo. Te bwabetito n te kateboaki bon te kanikina ae tabu ibukin te mate, te taunaki, ao Mangautin Iesu Kristo; e tei ibukin tokin maium ngkoa ao moanakin te maiu ae boou bwa te tia irira Iesu Kristo.

E aera Ngkai I Kainanoa Karekean te Tamnei ae Raoiroi?

Ngkai te bwabetito e kaitiakiko man am bure, te Tamnei ae Raoiroi e katabuko, ke kaitiakiko. Ngkana ko teimatoa ni kakanimaki nakon am berita n te bwabetito, ko kona ni irianaki n



te Tamnei ae Raoiroi n taai nako. Aomata ni kabane aika raoiroi a kona n namakina mwaakan te Tamnei ae Raoiroi, ma ti naake a bwabetitoaki ao a butimaea te Tamnei ae Raoiroi ae iai inaomataia ni karekea bwa raraopia rinanon maiua.

Te Tamnei ae Raoiroi e buokiko ni kina ao n ota n te koaua. E karekea te korakora ao te kairiiri n te tamnei. E karaua nanom n tain kangaanga ao e kairiko ngkana ko karaoi am babaire. Ko kona n namakina ana tangira ao mwaakan te Atua ni maium ni katoa bong rinanon te Tamnei ae Raoiroi.

Ko kona n reireiaki ao ni kairaki iroun te Tamnei ae Raoiroi. “Te Tia Ibuobuoki, are te Tamnei are Raoiroi, are E na kanakomaia te Tama n arau, E na reireini ngkami bwai ni kabane, ao E na kauring i nanomi bwai ni kabane ake I tia atongi nakoimi.”

Ioane 14:26

Am konabwai ni kimwareirei n te bwaintiuaraoi mairoun te Atua e na reke man am ongeaaba nakon ana tua te Atua. Te Tamnei ae Raoiroi e aki kona n tiku irouwia naake aki maiukina Ana reirei te Atua. A kabuaa te tibwanga ae kakaawaki ae ana boutoka ao ana kairiiri te Tamnei. Kekeiaki n taai nako bwa ko na tau ibukin ana iraorao ao ana kairiiri te Tamnei ae Raoiroi.

Ko karekea te Tamnei ae raoroi imwiin te bwabetito. N te otenanti ae aranaki bwa te **kamatoaaki**, temanna ke a mwaiti riki kaain te nakoanibonga ae iai irouwia te kariaiakaki a na katokai baia iaon atuum. A kamatoako bwa kaain te Ekaretia ao a kakabwaiako bwa ko na karekea te Tamnei ae Raoiroi. E kakaraoaki te otenanti aio n tain te taromauri n te tai ae na aki maan imwiin te bwabetito.

Ngkana ko a tia ni bwabetitoaki ao imwina ko na kamatoaki, ko riki bwa kaain Ana Ekaretia Iesu Kristo Ibukiia Aika Itiaki ni Boong Aika Kaitira.

*Taeka akana a kaurauraaki a kabwarabwaraaki n te iteraniba 18 ao 19.

Ko anganaki te Tamnei ae Raoiroi n te katokabai.





Te Toa

Imwiin bwabetitoakim, ko kona ni kabouui am berita n te bwabetito ni katoa wiiki ngkana ko kana te **toa**. N tain te bootaki n toa, te kariki ao te ran a kakabwaiaaki ao a kabutaki n koia kaain te bootaki n taromauri bwa kauringaan ana Mwakuri ni Kamaiu Iesu Kristo. Te kariki e tei ibukin Rabwatana, ao te ran e tei ibukin Raraana. Ngkai ko kabouui am berita n te bwabetito, ko anganaki te berita bwa e na reke iroum te Tamnei, ke te Tamnei ae Raapiro, e na mena iroum n taai nako.

T_e toa e buokiko n uring-n_{ga} ma te kakaitau maiuna, ana mwakuri, ao ana Mwakuri ni Kamaiu Iesu Kristo.

*Taeka akana a kaurauraaki a kabwarabwaraaki n te iteraniba 18 ao 19.

TE TEIMATOA NI KAROKOA TE TOKI

Ko riki bwa kaain Ana Ekaretia Iesu Kristo Ibukiia Aika Itiaki ni Boong Aika Kaitira rinanon te onimaki iroun Iesu Kristo, te rai-rannano, ao taian otenanti ae te bwabetito ao te kamatoaaki. Imwiin rikim bwa kaain te Ekaretia, ko na waaki nako ni kariki-rakea am atatai. Ko na waaki nako ni kamwakura am onimaki iroun Iesu Kristo, rairananom, kabouua am berita n te bwabetito man kana te toa, ao ni iriira ana kairiiri te Tamnei ae Raoiroi. Moan tua ma otenanti aikai n te euangkerio bon te banna ae ko na iriiria inanon maium. Te berita inanon maium aei e aki toki n aranaki bwa te “teimatoa ni karokoa te toki.”

Te teimatoa ni karokoa te toki e karekea te kawai, te rau, ao te kukurei n te maiu. Ko na namakina te kimwareirei ni kataia ni katootonga Iesu Kristo n am tai ni beku ao ni ibuobuoki nakoia kaain rarikim. Ko na kona riki n ataa reitakim ma Tamam are i Karawa ao n namakina ana tangira ae kororaoi ibukim. Ko na namakina te kantaninga ao manenam n te aonaaba ae angin te tai e kananokaawaki ao e bati katabeaiangana.

Ana euangkerio Iesu Kristo
bon kawain te maiu.

“Kam riai ni waaki nako n teimatoa inanon Kristo, ngkai e a reke iroumi otan te kantaninga ae kororaoi, ma tangiran te Atua ma aomata ni kabane. Mangaia ae kam na waaki nako, ni kaawakin ana taeka Kristo, ao n teimatoa ni karokoa te toki, ao taraia, e kangai ana taeka te Tama: E na reke iroumi te maiu ae akea tokina.”

2 Nibwaai 31:20



N NA KANGA N ATAIA?

Ana euangkerio Iesu Kristo e a tia ni kaokaki rinanon te kaotioti mairoun te Atua nakon te Burabeti Iotebwa Timiti ao burabeti riki tabeman.

Ko kona n ataia i bon iroum bwa bwaai aikai a koaua ngkana ko bubutia Tamam are i Karawa n te tataro. E na kaekako rinanon te Tamnei ae Raoiroi, are e aranaki naba bwa Tamnein te Atua. Te Tamnei ae Raoiroi e kakoaua, ke anga te kakoaua, ibukin Tamara are i Karawa ao Iesu Kristo. Te Tamnei ae Raoiroi e kamatoa te koaua rinanon taian namakin, iango, ao taian banna. Taian namakin ake a roko mairoun te Tamnei ae Raoiroi a rangi ni mwaaka, ma a bon karaurau ao n aki rangi n otara. N aron are e reiakinaki n te Baibara, “Uaan te Tamnei te tangira, te kimwareirei, te rau, te taotaonaki n nano, te karaurau, te raoiroi, te kakaonimaki, te nimamanei, [ao] te tau-bang” (I-Karatia 5:22–23).

Namakin aikai mairoun te Tamnei ae Raoiroi a kamatoaa bwa te rongorongo aei e bon koaua. Ko na kainnanoia ngkanne n ri-neia bwa ko na maiu n reitaki ma ana euangkerio Iesu Kristo ae kaokaki rinanon Iotebwa Timiti.

N na Kanga n Tataro?

- *Wetea Tamam are i Karawa.*
- *Kaota am namakin are i nanom (te kakaitau, titiraki, bubuti kamato-an koauan Ana Boki Moomon ao aia reirei mitinare).*
- *Kainiin (“N aran Iesu Kristo, amen”).*

RINANIN TAEKA

Te Akoi Te buoka ao te korakora mairoun te Atua are e anga rinanon ana nanoanga ao ana tangira Iesu Kristo. Rinanon Ana akoi, are e reke angana man Ana Mwakuri ni Kamaiu, aomata ni kabane a na manga kautaki. Rinanon Ana akoi, naake aki toki n rairinanoia ao ni maiuakina Ana Euangkerio a na namakina te teimatoa ni kaaniaki ma Tamaia are i Karawa n te maiu aei ao ni maeka ma Ngaia n te maiu ae na roko.

Te Berita Te boraraoi imarenan te Atua ao natina. Te Atua e anga babairean aron te berita, ao ti kariaia bwa ti na ongeaaba Nakoina. Te Atua e berita ibukin taian kakabwaia aika onoti ibukin ara ongeaaba.

Te Bwabetito Te mwaneka ae kainnanoaki ibukin karekean kbwaraan buure. Rinanon te bwabetito ao te kamatoaaki n te kariaiakaki iroun te nakoanibonga, ti a riki bwa kaain Ana Ekaretia Iesu Kristo Ibukiia Aika Itiaki ni Boong Aika Kaitira. Te bwabetito n te kateboaki inanon te ran, nanona bwa te aomata are e bwabetitoaki e katebonakoaki inanon te ran teutana te tai. Te bwabetito e kaota nanora ni kan iriira ana banna ni katooto Kristo ao ni karaoi ara berita ma te Atua.

Te Kamaiuaki Te kainaomataaki man te bure ao te mate. Te kamaiuaki e reke man Ana Mwakuri ni Kamaiu Iesu Kristo. Rinanon Mangautin Iesu Kristo, aomata ni kabane ana kona n tokanikai i aon mwaakan te mate. Ti kona naba ni kamaiuaki man mwaakan ara bure rinanon te onimaki iroun Iesu Kristo. Te onimaki aio e na otara n te maiu n rairannano ao te ongeaabba nakon tuua ao taian otenanti n te euangkerio ao te mwakuri ni ibuobuoki nakon Kristo.

Te Kamatoaaki Aron anganakin te aomata te Tamnei ae Raoiroi. N te otenanti aio, are tataneiai ni karaoaki n tain te bootaki n toa imwiin te bwabetito, e kamatoaaki iai te aomata, ke ea riki, bwa kaain Ana Ekaretia Iesu Kristo Ibukiia Aika Itiaki ni Boong Aika Kaitira.

Te Mwakuri ni Kamaiu Te bwai ae e karekea reiakinara ma te Atua. Karaoan te mwakuri ni kamaiu bon te kamarakaki ibukin boon te bure, n te aro anne e kanakoaki mwiin te bure mairouia taan bure ake a rairannano. Iesu Kristo bon ti ngaia ae kona ni karaoa te Mwakuri ni Kamaiu ae kororaoi ibukiia aomata ni kabane. Ana Mwakuri ni Kamaiu e irianaki ma te maraki ibukin ara bure, waanakon Raraana, ao Matena ao Mangautina. Ibukin te Mwakuri ni Kamaiu, aomata ni kabane ake a tia ni maiu a na manga kautaki. Te Mwakuri ni Kamaiu e karekea nakoiria te kawai ni kabwaraaki ara bure ao ni maiu n aki totoki ma te Atua.

Otenanti Te waaki ae tabu, ae baireaki raoi are karaoaki ti n te kariaiakaki n te nakoanibonga. Katooto a raonaki n te bwabetito, butimaean te Tamnei ae Raoiroi, ao te toa. Otenanti n angin te tai bon aanga ni karaoan berita ma te Atua.

Te Toa Te otenanti are kaurungiia kaain te Ekaretia Ana Mwakuri ni Kamaiu Iesu Kristo. Ngkana ti kana te toa, ti kaboui berita ake ti karaoi n te bwabetito. Te kariki ao te ran a kakabwaiaki ao anganaki kaain te bootaki n taromauri. Te kariki e tei ibukin rabwatan Iesu Kristo, ao te ran e tei ibukin Raraana. Te otenanti aio e karaoaki ni katoa wiiki n te bootaki n taromauri ae aranaki bwa te bootaki n toa.

REITAN TE KAMATEBWAI

Titiraki ao koroboki aika tabu aika kaotaki imwiin aei a na buokiko n atai riki moan tuua n te boki ae uarereke aei ao ni karau ni iangoi. Bwaai aika karinanaki ikai aki tabwanin raoi; kibun taeka n tokin te iteraniba ao bwaai aika iai rekerekeia ni booki aika tabu a na kairiko nakon reitan ikota ni kibun taeka ao bwaai aika kainnanoaki.

Tera ana euangkerio Iesu Kristo?

3 Nibwaai 27:13–22 (Ana Boki Moomon, iteraniba 515)

Tera nanon ae na iai am onimaki?

E na kanga ni kona n anganiko te korakora te onimaki?

Ebera 11:1, 6 (Baibara, Nu Tetamenti)

Aramwa 32:21, 26–28 (Ana Boki Moomon, iteraniba 315–16)

Eta 12:6 (Ana Boki Moomon, iteraniba 572)

Tera ae nanonaki n te rairannano?

E aera ngkai aomata ni kabane a riai n rairannano?

Ruka 15:3–10 (Baibara, Nu Tetamenti)

Mwakuri 3:19 (Baibara, Nu Tetamenti)

Aramwa 12:33–34 (Ana Boki Moomon, iteraniba 259)

E aera ngkai aomata ni kabane a riai ni bwabetitoaki?

Mwakuri 2:38 (Baibara, Nu Tetamenti)

2 Nibwaai 31–32 (Ana Boki Moomon, iteraniba 116–20)

Tera te Tamnei ae Raoiroi?

E na kanga ni kona ni kakabwaia maium te Tamnei ae Raoiroi?

2 Nibwaai 32:5 (Ana Boki Moomon, iteraniba 119)

3 Nibwaai 27:20 (Ana Boki Moomon, iteraniba 515)

Tera te kaantaninga ibukin te toa?

3 Nibwaai 18:1–12 (Ana Boki Moomon, iteraniba 496)

Moronaai 4–5 (Ana Boki Moomon, iteraniba 584–85)

Tera nanon te teimatoa ni uaa te toki?

2 Nibwaai 31:15–20 (Ana Boki Moomon, iteraniba 118)

3 Nibwaai 15:9 (Ana Boki Moomon, iteraniba 491–92)

TAROMAURI MA NGAIRA

NAKOMAI NOORIA BWA E NA KANGA NI KONA TE
EUANGKERIO AE A TIA N KAOKAI NI KAKABWAIA MAIUM



Te bootaki n toa bon te oi ni bootaki n taromauri. Kanga n arona raoi e riaon teuana te aua manna ao aron waakina ae tabangaki, aikai kanoana:

Taian Anene: Aneneaki irouia kaain te bootaki. (A katauraoaki booki n anene.)

Taian Tataro: A karaoaki irouia kaain te Ekaretia n te tabo.

Te toa: Te kariki ao te ran a kakabwaiaki ao a tibwaaki nakoia kaain te bootaki ni kauringaan Ana Mwakuri ni Kamaiu Iesu Kristo.

Taan taetae: Angiin te tai temanna ke uoman kaain te bootaki a kaman anganaki katabeaia i mwaain taina bwa a na taetae iaon rongorongo man te euangkerio.

Kunniikai: Mwaane ao ataeinimwaane a taneiai ni bwaina te kooti ke kawaerake mwarairai aika tamaroa ma te kabaraki ao te neketai. Aine ao ataeinaine a bwaina te bwakaereti ke kamumun.

Anga karea a aki karaoaki n tain bootaki n taromauri.

Ti kaoko naba bwa ko na irii bootaki ake tabeua, n aron ake ko nano iai ao am karinan n roro. Aron karaoaan ao reken tain karaoa-an bootaki a kona ni bibitaki.

Reirei n Taabati: Kiraati ibukin reiakinan booki aika tabu ao reirei man te euangkerio.

Bootakin te Nakoanibonga: Kiraati ibukiia mwaane ao ataeinimwaane man te roro 12 ni waerake.

Te Bootaki n Aine: Kiraati ibukiia aine man te roro 18 ni waerake.

Te Bootaki n Ataeinaine: Kiraati ibukiia ataeinaine man te roro 12 nakon 18.

Moanrinan: Mwakuri ni ibuobuoki n te kurubu ao kiraati ibukiia ataei man te roro 3 nakon 11. Te netiari (nursery) ibukiia ataei man te roro 18 te namwakaina nakon 3 te ririki e katauraoaki anguin te tai.



Tain te bootaki n toa: _____

Te taetae n te Umwantabu: _____

Tera ae I riai ni karaoria?

- Wareka Ana Boki Moomon.

Wareware aika kataautauaki: _____

- Tataro bwa ko na ataia bwa Iesu Kristo bon am Tia Kamaiu.
- Rairananom ao tataro ibukin kabwaraan am bure. Kekeiaki ni maiuakina ana tua te Atua.
- Iriira te taromauri.
- Katauraoiko nakon te bwabetito n te _____
- Nakon www.mormon.org n reiakina riki rongorongan ana euangkerio Iesu Kristo are e a tia ni kaokaki.
- Reitanako te botaki ma mitinare n reirei riki taekan koaua ake E a tia te Atua ni kaoki rinanoia burabeti ni boong aikai.

Tain kawarakim are imwiina: _____

Araia mitinare ao nambwan aia tareboon:

ANA EKARETIA
IESU KRISTO
IBUKIJA AIKA ITIAKI
NI BOONG AIKA KAITIRA

www.mormon.org

Kakaitau Ibukin Tamnei

Tinanikun te Moaniba: Rongorongo man Ran ni Kamaiu, iiron Simon Dewey. © Simon Dewey.

Tai karaoa te katooto


Iteraniba 2: Rongorongo man Te Kabwarabwara iaon te Maunga, iiron Carl Heinrich Bloch. Kabonganaki man ana kariaia te National Historic Museum i Frederiksborg i Hillerød, Denmark

Iteraniba 5: Kristo E Kauta Natin Iaio te Aine, iiron Greg K. Olsen. © Greg K. Olsen

Iteraniba 6: Te Tia Kafoki Aoraki ae Atataiaoamata, iiron Greg K. Olsen. © Conceptions Unlimited Investments, Inc. Tai Karaoa te katooto

Iteraniba 9: Ioane te Tia Bwabetito e Bwabetito Iesu, iiron Greg K. Olsen. © Greg K. Olsen. Tai karaoa te katooto

Iteraniba 11, 12, 16, 22, 23 iiron Steve Bunderson



KIRIBATI



4 02011 50859 7
01150 859